



# 'Sikap tunggu dan lihat' punca daftar imunisasi rendah

Oleh [Luqman Arif Abdul Karim](#) - Mac 1, 2021 @ 2:33pm

[luqman.arif@bh.com.my](mailto:luqman.arif@bh.com.my)

PUTRAJAYA: Kadar pendaftaran untuk mendapatkan suntikan vaksin yang kurang memberangsangkan ketika ini, berpunca daripada sikap 'tunggu dan lihat' dalam kalangan rakyat negara ini.

Menteri Sains, Teknologi dan Inovasi, Khairy Jamaluddin, berkata situasi sedemikian sudah dijangka, namun kerajaan menaruh kepercayaan kadar pendaftaran bakal meningkat dalam tempoh terdekat.

Katanya, peningkatan kadar pendaftaran mampu dicapai seiring pembukaan kaedah pendaftaran menerusi laman web rasmi, secara dalam talian dan berkunjung ke hospital atau klinik berdekatan.

"Kedudukan perangkaan terkini setakat jam 11 pagi, hari ini menyaksikan seramai 1,468,137 orang sudah daftar bagi mendapatkan vaksin menerusi MySejahtera.

"Ini hanya mewakili 6.1 peratus daripada keseluruhan penduduk, berbanding sasaran asal kita iaitu 80 peratus, justeru kadar pendaftaran ini masih di tahap agak rendah.

"Kita perlu tingkatkan usaha bagi memacu pendaftaran," katanya mesyuarat Jawatankuasa Khas Jaminan Akses Bekalan Vaksin COVID-19 (JKJAV), di sini, hari ini.

Yang turut hadir pada sidang media secara bersama itu ialah Menteri Kesihatan, Datuk Seri Dr Adham Baba.

Khairy berkata, kerajaan setakat ini tidak mempunyai sebarang sasaran atau unjuran terhadap kadar pendaftaran mengikut tempoh tertentu bagi mendapatkan suntikan imunisasi COVID-19, sejak ia dibuka kepada orang ramai pada 24 Februari lalu.

Bagaimanapun, beliau menzahirkan kebimbangan berhubung kadar pendaftaran semasa, memandangkan suntikan vaksin dalam kalangan rakyat amat penting bagi memastikan Malaysia bebas belunggu pandemik COVID-19.

"Memang kita sudah jangka keadaan sebegini, tetapi saya percaya apabila ramai lagi barisan hadapan terima vaksin, rakyat akan lebih yakin untuk membuat pendaftaran.

"Justeru, kita akan pantau dari semasa ke semasa," katanya.

Berdasarkan perangkaan semasa, Khairy mendedahkan seramai 17,064 orang kini sudah menerima suntikan vaksin COVID-19 di seluruh negara, dengan Sarawak dinobatkan negeri yang merekodkan kadar pemberian imunisasi tertinggi iaitu 7,402 penerima.

Beliau berkata, ia disusuli Pahang dengan 2,419 penerima dan Perak (1,277), manakala daerah tertinggi pemberian vaksin ialah Kuching, Sarawak membabitkan 1,677 orang, Sibu (1,360), Kinta, Perak (1,141), Kuantan, Pahang (1,075) dan Mukah, Sarawak (822).

Mengulas penjualan vaksin COVID-19 di Malaysia menerusi syarikat farmeseutikal swasta, Khairy berkata, ia perlu mendapatkan kelulusan Bahagian Kawal Selia Farmasi Negara (NPRA), namun pihaknya setakat ini dimaklumkan tiada sebarang permohonan untuk tujuan itu.

"Jika lulus (oleh NPRA), boleh bincang dengan kerajaan untuk memperhalusi bekalan kepada masyarakat, setakat ini perolehan hanya antara menerusi Kerajaan Persekutuan dan tiada permohonan diterima dalam kalangan syarikat swasta," katanya.



Gambar hiasan botol vaksin dan suntikan sebagai gambar hiasaan story Covid-19. - Foto Aswadi Alias

